

Efesas Poli'a Efesasi Mono Naga'mokizmi Avonkrezmi'nea Naneke

*Anumzamo'a Jisasimpi huvazino tazeri kasefa
vahe nesea naneke*

¹ Hagi Poli'na, Kraisi Jisasi aposolo eri'za ne'mo'na Anumzamo Agra'a avesite huhampri nantenege'na, Efesasi kumate zamentinti nehaza naga'ma (Saints) mani'ne'za, Kraisi Jisasinte tamage zamentinti nehu'za amage' nentaza vahetega ama avona kre netroe.

² Anumza Nerafantegati'ene Ranti Jisasi Kraisi-integati asunku'zane, rimpa fruzamo'a tamagane mesie.

*Kraisimpi huvazino Anumzamo'a monafinti
mikoza neramia zamofa naneke*

³ Hagi Anumzamofa ra agi amisune, Ranti Jisasi Kraisi Nefa'ma mona kumapinti Kraisimpi, avamupina maka asomura hurante'ne.

⁴ Korapara Agra mopa erifore osu'nea knafi agu'areti avesiranteno, Kraisi'ene otage huta fatgo zampi, havizana omanesigeta Agri avure manisnune huno tagrira huhampriante'ne.

⁵ Korapa Agra huhampri tanteno mofavreni'aza hugahaze huno Jisasi Kraisi'ene, tavreno Agrarega tante'ne, Agra'a so'e zanteti antahiramino anara hu'ne.

⁶ Anumzamo'a avesinentemofu Jisas Kraisiimpi taza hu'zana eri tagitregeno erami'nea zankura, ra agi amisune.

⁷ Kraisi koranu tahokeheno miza seneranteno, maka kumitia eri fanane nehuno, tusi'a asunku zama'areti Agra asuragiranteno taza hu'ne,

⁸ Agra rama'a zampi tagrira taza hu'ne. Mika fatgo antahintahine, knare tagu tagesa tami'ne.

⁹ Korapa Agri'a agu'afi oku'a me'nea antahi'za eriamu huno taveri hu'ne. Kraisi'a zamaza hugahie huno agu'afi atre'nea tzahu'za, Agra'a eriamu hu'ne.

¹⁰ Anumzamo ofenka'ati mago knama esia zupa, monane mopane eri mago huno, maka Kraisi kvafi antenaku antahi'neane,

¹¹ korapa agafare Anumzamo'a Agra'a avesite ko antahino keno huteno, maka'zana Kraisiinteti erisanti hare'snaze huno tavarenaku huhampri rante'ne.

¹² Tagra ana nehuta, Jiu vahe'mota Kraisiinte tamentintima pusante nehumota tagra, Anumzamofona ra agi amigahune.

¹³ Tamagranena tamage kema Kraisiimpinti ko antahitetma, manivava tamasimu eri'zanku Knare Musenke'are tamentintia nehazageno, Agra Ruotge Avamu'anu azanko avona kreno huhampri (seal) tamanteno tamami'ne.

¹⁴ Avamu'ama tami'neana huhamprianteno henka'anena ruga'a knarezantmima huhampri-rante'nea zantamina erigahune huno tami'negu Anumzamofona muse hunenteta ra agi amisune.

*Poli'a, Efesasi kumate vahe knare zamagu zam-
agesa Anumzamo zamisigu nunamu hu'nea naneke*

15 Hagi e'ina hu'nea agafare nagranena, Ranti Jisasinte tamagra tamentintima nehaza ke'ne, maka Anumzamofa naga otge hu'za nemani'za naga'ma tamavesima nezmantaza zanku nentahi'na,

16 maka zupa nunamuni'afina nagerakani noramante'na, tamagrikura Anumzamofona susu hunentoe.

17 Anumzamo'a so'e hihamu'ane masamofa Nafa'amo Ranti Jisas Kraisi Anumzamo'a knare antahi'zane, tamagu tamagesane, tamage ke'a huama hu antahi'zamofa avamura tamisnigeta Agrira antahita keta nehuta, avamupina ra hanazegu nehue.

18 Nagra nunamu nehuankino antahintahitamofona masa tamina, tamagu'amofa avurgamo hari nehanigetma, Agrama kezatino fore hugahie huno tamagima nehiazana, tamagra kegahaze. Mizama'a mareri'nea zantmi, hihamu'ane msazama'afi Anumzamo'a tamina, Agrite mani ruotge nehaza vahe'mo'zane, tamagra erigahaze.

19 Hanki ana nehuta tagrama tamentinti nehuna vahe'ma agatererfa razama, Agra hanave'a tami'neana, ama ana hihamu'agino,

20 tusi'a hihamu'afi Kraisi fri'nefintira, Agra azeri otiteno monare azantamaga kaziga avare antegeni mani'ne.

21 Mareri onagate'nea tra'ma kvahu hanavema, maka zante kvama hu'neane, mika zamofa agima ko'ma antemi'neane, menima ama mani'nona knafinkerompage, henkama esia knafinena agatereno onaga'a mani'ne.

22 Maka'zana Kraisi azampi kva hanie huno

ante'ne, Agri kvafi maka'zana mono kevumotagu (sios) huno ante'ne.

²³ Mono kevuma mani'nazana Kraisi avufgagna mani'naze. Kraisi mani viteno nemanino maka zampina anazanke huno manivite'ne.

2

Fri' vahekna huta mani'nonkeno Jisasimpi taz-eri oti'nea naneke

¹ Hagi korapara ke ruhanentagita, kumitmifi fri'nazane.

² Tamagranena maka mopafi vahe'mo'za nehazankna huta havi kante nevezane, kumi'tmimo avite'negeta, Sata kerera amage anteta, kankamumpi nemaniza hihamu'ane kva avamutamimofo amage anteta, Sata eri'zana enerita Anumzamofonte zamagu'a onte'za zamefi hunemi'za vahe'ene nemanizane.

³ Zamagri amu'nompina korapara tagranena anazanke huta maka havi tavesi'zante amage ante'none, tagu'afine amega tavufafine tave'manesiaza hutere nehuta, tagra ana kefozampi fore huta amage' nentonkeno, Anumzamofona asi vazi'zamo tagrite'ene maka vahete' enena e'ne.

⁴ Hu'neanagi Anumzamofa asuragi'zamo vite'ne, na'ankure tusi'a avesi'zanu Agra agu'areti tagrira avesi rante'ne.

⁵ Kasege'a ruha'nentagita fri vahe kna huta mani'nonkeno, asunku'zanteti tahokeno, Kraisiimpi tagrira fri'zampitira tazeri otino,

⁶ magopi mona kuma'are tantegeta, Agrane kini tra'are mani'none.

7 Anama hu'neana henkama fore hania knarera, agatere'nea zana Agri'a marerisa asunku'zanu tagrira Krai Jisasimpi taza huno agampu hurantesigu anara hu'ne.

8 Na'ankure tamentinti nehzagu asuntgira-manteno tamaza huno tamavre'ne. Tamagra'a knare'za hu'naza zante anara osu'neanki Anumzamo museza (gift) tami'ne.

9 Eri'za eri'nea mizana omnene, e'igu mago vahe'mo'a, agra'a agi erisaga osugahie.

10 Na'ankure tagrira, Agra'a tro hurante'ne, Krai Jisasimpi knare eri'za erisnunku, Anumzamo'a korapa ana kana retro hunte'neankita, knare eri'za enerita ana kantera vugahune.

Kraisimpi tazeri ksefa hu'nea naneke

11 E'i zanku tamagra tamagesa antahiho, korapara tamagra megia vahere huta mani'nazane (Gentiles), tamagima ante'nazana, zamufa taga osu vahere nehu'za, zamufama taga nehaza vahe'mo'za, (Jiu) e'i zamazanu zamufa azeri'ne'za taga nehaze.

12 Tamagra tamagesa antahini hiho, tamagra e'i ana knarera Kraisina afe'are mani'nazane, Israeli vahe krerafane omani'nazane, huvempa huno huhagerafi zamante'nea agu'afina omani'nazane, so'e mani'zama eri kankamutamia omanegeno, tamagri Anumzana mopafina omani'neane.

13 Hu'neanagi menina Krai Jisasimpi afete'ma koteta tamagra mani'nazafintira, Kraisi koramo tamavreno tava'oma'are neramante.

14 Na'ankure Agra'a tarimpa fru huno mani'zana (peace) neramino, Jiu vahe'ene megia

vahe'mota ha' orente arente nehunana tazeri magopi neranteno, amu'nontifima atane'zama me'neana, eritreno tazeri mago hu'ne.

¹⁵ Agra'a avufareti ha' orente arente nehu'nazana eri fanane nehuno, Jiu vahe kasege ramine, osi kasege ramimo megia' vahe (Gentiles) tazeri feği atre'nea kasege ramina eri netreno, Agra'a Jiu vahe'ene megia' vahemota tazerino magoke vahe tro huneranteno, ke ha'ma nehuna zana tazeri fru huno mago tarimpa hurante'ne.

¹⁶ Rugeka zafare Kraisi'a frino ha' frama tamagra'rmagra hu'zana eritreno, tamazeri mago higetma, Anumzamofona magoke avufagna hu'naze.

¹⁷ Agra eno rimpa fru huno manizamofonanekea afete'ma mani'naza vahera mono kea huzmasmi'ne, hagi tava'onte mani'naza vahera rimpa fru huzmante'ne.

¹⁸ Na'ankure Agripinti tarega vahe'mota, magoke Avamu e'nerita, Nerfantera vugahune.

¹⁹ E'i zanku tamagra menina megia' vahe'mota, emani vahe knara osu'naze. Hianagi tamagra Anumzamofonaga'ene noma'afi nemanize.

²⁰ Aposolo naga'ene kasnampa naga'mo'za, tra'zafagna hu'naze. Kraisi' Jisasi'a Agra nomofonarentete tra havegna hu'ne.

²¹ Agripi ana miko nomofonte, vazinte zafamo'za ome vazinte eme vazinte hiankna hu'za hagera ra hu'za, Ramofonotage mono noma'a efore nehaze.

²² Tamagra ana nonkna hutma mani'nazageno, Anumzamofonaga'ene Avamu'amo'enena ana nompina mani'ne.

3

Poli'a meg'i'a vahepi mono ke hu'nea naneke

¹ Hagi ama'na agafare nagra Poli'na Kraisi Jisasi eri'zampina kina tamagri'ma (Gentiles) tamazahu zantera hu'noe.

² Anumzamo'a asunku hurmanteno tamagritega naneke'ama huamahu eri'zama nami'neana tamagra ko antahinegahaze.

³ Anumzamo oku'a me'nea antahi'zama'eria huna naverige'na, nagra osi'a naneke kote'na avompina kre'noe.

⁴ Kegahazema hu'na kre'noa avoma hamprisuta antahi'zaniafi oku'a me'nea antahi'zama Kraisi'ku'ma hu'noa kea tamagra antahi'ama hugahaze.

⁵ E'i ana antahi'zana korapa vahe'mo'za eria hige'za ontahi'nazane. Hagi menina Agra'a aposolo vahete'ene kasnampa vahete Avamu'mo eria nehie.

⁶ Ama'i oku'a antahintahigino, meg'i'a vahe'mo'za (Gentiles) Jiu vahe'ene mago'zanke hu'za marerisa knare'zana, Anumzamof mofavreramine erigahaze. Ana tare kevumo'za knare muse nanekere zamentinti nehu'za, magoke avufa neman'i'za, huhampri zamante'nea asomura Kraisi Jisasi'pinti muse hu'za erigahaze.

⁷ Ama Knare Musenkemof (Gutnius) eri'za vahe nagra mani'noe, Anumzamo asunku huananteno muse'za hanavea nami'nea hanave'afi eri'zana e'nerue.

⁸ Nagra mago'a mono eri'za (saints) vahepina, osi'tfa hu'nogeno asunku huananteno, urefa erefa'a omne naneke meg'i'a vahepi huama huo

huno namige'na, Kraisimpi knare'za me'neaza eriamu hu'na neramasmue.

⁹ Nagrira Anumzamo maka'zama tro'ma hu'nea Ne'mo, oku'a ama naneke korapa ante'nea naneke huhampri nantege'na, ama nanekea hakare'a vahete eriamu nehue.

¹⁰ E'ina hu'neankino Anumzamofona ruzahu ruzahu knare antahi'zana mono vahe'mo'za eriamu nehanage'za, mona kunkamumpi kegava nehaza vahe'ene, manisga hu'naza kva vahe'mo'za kegahaze.

¹¹ Ama'i korapa monane, mopane tro osu'nenno, tro huntogeno me'nea antahintahi Krais Jisasi Rantimofompi eri ama hu'ne.

¹² Na'ankure Kraisinte tagra tamentinti nehunku, koro osuta Anumzamofu tavaonte nevune.

¹³ E'ina hianagi nagri'ma tusi'a zampi nazeri haviza nehaza zankura tamarimpa havizana osiho, e'ima nazeri haviza nehaza zamo'a tamagri tamaza hanigeta knare hutma manigahaze.

Poli'a mani hanavetisagu nunamu hu'nea naneke

¹⁴ Ama ana agafare, Nerfante narena re'na nunamuna nehue.

¹⁵ Hakare monafi naga'ene, mopafi naga'mo'za Agripinti zamagia e'nerize.

¹⁶ Nagra nunamu nehue, Agra'a marerisa knare'za huhampri tamanteno hanave'afi tamazeri hampo'na hanigu, Agra'a Avamu'a vahe'mofu agu'afinka ante'ne.

¹⁷ E'ina hanageno, tamentinti nehazagu Kraisi'a tamagu'afi mani'nesigetma, tamagra mopafi

zafamo rafu'na reno oti hanave tiankna huta Anumzane, tamararuhe'i kizmia tamagu'areti huta zamavesi zmantegahaze.

¹⁸ Ana nehutma maka Anumzamofu naga'mo'za (saints) nentahizankna hutma kagatahu'ane, zaza'ane, atrure'ane, zaza huno fenka urami'nea avesi'zana kegahaze.

¹⁹ Ana nehutma Kraisi agu'areti avesima rante'nea zamo'a antahi'zana agatere'neakitma ketma antahitama nehutma, tusi'a zantfa me'neankitma ana mikora antahi amara osugahaze. E'ina hanigetma tamagra knare mani'zane hanavene Anumzamofontegati avi'mateno ne-eazana kegahaze.

²⁰ Menina Agri'ma antahima negona zampina agtereno mevite'neankino, tagu tagesama nentahunazana agtereno amne anazana hugahie. Agri hanavemo tagu'afi eri'za e'nerie,

²¹ Ana hanigeno maka mono vahe'mo'za, Kraisi Jisasimpi, Anumzamofu agi'a erisga huvava hugahaze. Tamage.

4

Kraisi'ene hagerafita manisuna naneke

¹ E'ina hu'negu nagra Ramofu kina vahe'mo'na, knare hutma mani'zantamifi kana nevutma, tamagima higetma eri'naza zanku hampo'nati'na tamavumro nentoe.

² Tamavufga anteramitma, agazone hutma ru vahe'ene nemanitma, ke hakare osutma fru hutma, vahe'mofu antahizamitma zamesi zamanteho.

3 Hakare zupa hanavetitma Avamu'ene tragotetma nemanitma, hamprima tamanteno anaki'ma tamante'nea fruzana erigahaze.

4 Tagra mika'mota magoke tavufgafi magoke Avamu mani'neankino, anahukna huno e'ima tagi hu'neana magoke Anumzamofu naga fore hanunku tagi hu'ne.

5 Magoke Rantia manigeno, magoke tamentinti megeta, magoke mono ti nefrone.

6 Anumza Nerfa'a maka'mota magoke mani'neni kva huneranteno, maka'za kva nehuno maka'zampina mani'ne.

7 Hu'neanagi magoke magoke'mota asunku'zana ruzahu ruzahu muse'za Kraisi'a tami'ne.

8 E'ina hu'negu avontafepina anage hu'ne, ***Agrama anagamu marenerino'a, Agra vugota huno kina vahe zamareno vu'ne. Agra'a vahera muse'za zami'ne.*** (Sam-Zga 68:18)

9 Menina anage nehzankea me'ne, anagamu mareri'ne, ana kemofona nankna agu'agesa me'ne, Agra anazanke huno mopa agu'afi urami'neana?

10 Agra urami'nemo otino marerino maka mona agatereno afete mani'neankino, Agra hakare zampina mani avitesigu anara hu'ne.

11 Mago'a nagara Agra aposol eri'za nezmino, mago'a nagara kasnampa eri'za nezmino, mago'a nagara mono ke huamahu eri'za nezmino, mago'a nagara mono kevu kegava kri eriza nezmino, mago'a nagara rempi huzmi eriza zami'ne.

12 Eri'za erisaza'zama, naga'amokizmi (Saints)

zami'neana, non kiaza hu'za Kraisi avufa eri ra hugahaze,

¹³ ana nehuta Anumzamofu Mofavre'are tamentintifina eri mago huta keta antahita nehuta, hanave enerita Ramofonte nena vahetfa nemanita, Kraisi avu'avapina aviteta Agri kna huta manigahune.

¹⁴ Ana agafare tagra osi mofavregna huta omani'nunkeno, hagerimo erikranto kranto hiankna tamentintifina osnie. Na'ankure mago'amo'za ruzahu ke hunerasmi'za, anankea havige hu'za eri tamage ke'na ke nerasmize.

¹⁵ Hianagi tamage ke nehuta, tagu'areti vahera zamesi nezmanteta, hgeta nena nehanunkeno maka'zamofona Kraisi aseni'a manigahie.

¹⁶ Agripi miko avufamo omoni, emeni huno azeri hanavetisigeno, magoke magoke avufamo'a ruzahu ruzahu eri'za e'nerino, miko avufamo'a ra huno knare avesi'zampi hagegahie.

Ruotge huta manisuna naneke

¹⁷ Hagi Ramofu hanave'afi anage hu'na neramasamue, mono nontahiza vahe knara (Gentiles) osiho, zamagra hzanegre'za mago'zana zamagu'areti hugara osu'naze.

¹⁸ Antahi'za zamifina hani hige'za, Anumzamofu mani'zampintira atre'za megi'a nemanize, na'ankure zamagra antahi'za ke'za nosazageno, zamagu'amo'a hanaveti'ne.

¹⁹ Ana nehu'za zamagra havizane knare'zane kegava nosu'za, zamesi'zamofu kefo avu'ava zampi nevazageno, zamagri mani'zampina maka havizamofu avesi'zamo avite'ne.

²⁰ Hu'neanagi tamagra, e'inahu zampintira Kraisina rempi huta ontahi'naze.

²¹ Tamagrama ko Agriku'ma nentahizageno Agripima rempi hurami'nea zana, Jisasimpi tamage nanekea me'ne.

²² Korapa ama mopafi kasri avu'avaza mani'zantamifi me'neane, maka havi tamagu tamagesa me'neane, havige na atreho.

²³ Ana nehuta antahintahifine, avamupi kasefa huta manigahaze.

²⁴ Kasefa vahe tro huta nemanita, Anumzankna huta fatgo avu'ava zampi ruotage huta tamage ke'afi manigahaze.

²⁵ E'ina hu'negu magoke magoke'motma havige osutma tamage hiho. Mago avufagna hutma mono kevu mani'nonanki, tva'ontamire ru vahe'ma mani'nesiana havigea huonteho.

²⁶ Tamarimpa hegahianagi, ana zampina kumira osiho, tamarimpa hesuta zaza kna omanita ko eri so'e hutkeno zage'a ufreno.

²⁷ Hankromofona (Satana) mago kankmuna tamagra omiho.

²⁸ Musufa ne'ma mani nesuno'a musufa oseno. Hianagi agra azampinti eri'za erino knare'zana erifore nehuno, zamagrazmi zamaza huga osu'nesaza nagara zamaza hugahie.

²⁹ Hanki tamagipintira vahe'mokizmia havi nanekene urinke'nena ozmasmitma, zamaza nehutma, hanaveti'za manisaza nanekege nehnageno, antahisamokizmi'a zamaza hugahie.

³⁰ Anumzamofa Avamura mani'zantmifina rim-pagna eriomio. Tmagesa antahiho, Avamu'mo agra azanko avoma'a kreno tamagra nagri na-

gare hu'neankino, esnia knarera tamaza huno tamavregahie.

³¹ Rimpa hevava hu'zane, maka rimpa haviza huno ha' hu'zane, rimpa he'zane, rankege hu'zane, vahe zamefi'a ke hu'zana netretma, maka vahe'ma knazama zami'zana atreho.

³² Agazone hutma vaheku tamasuntgi nezmantetma, Kraisimpi kumitia Anumzamo eri atre'rante'neankna hutma, kumi'zmia atre'zmanteho.

5

Avesi'zampi manisnaza naneke

¹ E'ina hu'negu Anumzamo nehia avu'avakna hutma tamavutmavara hiho, nankure tamagrira agu'areti avesi nermantea mofavre'a mani'naze,

² tamagra vaheku tamavesi nezmanteta, Kraisi'ma agu'areti avesiranteno agra'a avufga atreno tazama hu'neakna nehutma, Agra'a avufa tagriteku huno Anumzamofontega mananentake'za Kresramana vu'neakna hiho.

³ Hianagi monko'zano, kefo avu'avazano, agraguke avemasi'zana tamagripina omne tfaza hino, Anumzamofona otage nagapina (saints) e'inahu zana amu'no zamifina omnegahie.

⁴ Kefozamofu naneke osutma, vahe agze ami nanekene, zokago vakago nanekea ana maka netretma Anumzamofu muse huntaho.

⁵ Na'ankure tamagra antahi ankere'naze, monko'za nehaza vahe'ene, kefo avu'ava nehaza vahe'ene, vahe'zante kezmasane nehaza vahe'ene, havi anumzante mono hunentaza vahe'mo'za, Kraisine, Anumzamofu kumara e'origahaze.

Anumzamofu msazama'afi manisnuna naneke

⁶ Hagi atrenkeno mago nemo'a avufa'a omne keretira reramatga osino, na'ankure e'i ana zamo Anumzamofu rimpa he'zana erino kema non-tahiza vahetera ne-e.

⁷ E'i zanku ana vahe'enena tragotetma omaniho.

⁸ Na'ankure korapara hanizampi mani'nazane, hianagi menina Ramofu masafi mofavre'aza hutma, ana msafi vano hutma maniho.

⁹ Na'ankure msazamofu raga'a, knare'zama hu'zane, fatgozama hu'zane, tamage kema hu'za fore nehie.

¹⁰ Maraguzatitma Rantamimofu avema nesiaza rempi hiho.

¹¹ Raga'a reonteno hani avu'ava zantera tragora otetma, ke huta eriamahiho.

¹² Na'ankure asane osuga'zanku vahe'mokizmi zamagesafina havizama oku'a nehaza zankura tagaze hugahianki hutma antahitama osiho.

¹³ Hianagi masamo'ma remsa maka zantamina higeno'a, oku'a me'nea kefo zantmimo'a amate efore nehie.

¹⁴ Na'ankure hakarezama tavi'mo'ma eri ama nehigeno, e'i ana agafare amanage hu'ne, ***Kavu'ma mase'namoka kavunaso, fri'pintira otio, ana hanankeno Kraisi'a remsa hugantegahie.*** (Ais 26:19.)

¹⁵ E'i zanku kama vano hananana kva huo, antahi'za omne vahe knara osunka, antahi'za me'nea vahe kna huo,

¹⁶ kazigazi hutma maka knafina knare eri'za e'neritma maniho, na'ankure menina kefozamo hakare hu'neanknafi nemanune.

17 E'i zanku tamagra negi vahe knara osutma, Rantimofu avesi'zama hanaza zankuke tamagesa antahiho.

18 Waini tina netma negia oneho, na'ankure anazamo tamazeri haviza hugahie. Hianagi atrenkeno Avamu'mo tamagu'afina avitena,

19 atruma nehanutma, Deviti zagame ene (Sam zagamere), mono zagame'ene, avamu'mofu zagame'enena nehutma, Rantmimofona tamagu'areti musena hunenteta,

20 hakare zupa maka zampina Ranti Jisas Kraisi agifi, Anumza Nafatimofona musena huntaho.

Aravemokizmi naneke

21 Hagi Kraisina antahi'nemitma rumokizmia ovesinte avesinte hiho.

22 A'nemotma, Ramofu agorga nemaniza kna huta tamavenanehe'i agorga maniho.

23 Na'ankure vemo'a, a'mofona aseni'a mani'ne. Kraisi'a anahu kna huno mono kevumofu aseni'a mani'ne. Agra ana mono kevu mofu avufa'a mani'neni aza huno avare'ne.

24 Hianagi mono kevumo'za Kraisi kvafi nemanizankna hu'za, a'nemo'za nezmave kvafi maka'zana anazanke hu'za hugahaze.

25 Vene'nemotma, a'ne tmia tamagu'areti zmavesi zamanteho, Kraisi'ma mono kevu'agu agu'areti avesi zamanteno zamahoke heno ana a'ku (sios) fri'nea kna hiho.

26 Ana nehuno Agra'a mono naga'mofona zamazeri ruotge huzmanteno tinuti sese hiankna huno ke'anu sese huzmante'ne.

27 Anama hu'neana zamavareno Agrarega zamantesige'za, ana mono kevumo'za

masazampima pehena omneno, kasmu' oneno, avufa ohakne: otage hu'za fatgo zampi hazenke omnenke'za manisnazegu ana hu'ne.

²⁸ Hagi anazanke hu'za vene'nemo'za a'ne zamia, zamagra zamufagu zamavema nesia kna hu'za zmavesi zamanteho. Aza'o nenaronku avesima nentemo'a, agra'agu avesinente.

²⁹ Na'ankure maka vahe'mo'za zamagra zamufagura zamagora note, hianagi zamagra zamufagu avesinte'za ne'za nemi'za, kegava hazankna huno Kraisi'a mono' kevu'are kegava nehie.

³⁰ Na'ankure tagra Agri mago avufa mani'none.

³¹ E'i ana agafare ***Vemo'a nefane, nererane znatreno, nenaro'ene eri hagerafige'ne, tarega'mokea magoke znavufaza hugaha'e.*** (Anumzamofa avon tafepi amanage huno krente'ne, Jen-Agf 2:24.)

³² Amama oku'a me'nea antahi'zamo'a, razantfa se'ne, hu'neanagi nagrama nehuana Kraisinku ene, mono kevu'agu nehue.

³³ Anahuga hianagi, amu'nontamifina mago mago'mo'a nenaronkura avesi nenteno agra avufagu agha nentahiankna nehnigeno, nenaro'a anazanke huno nevena antahi nemino ke'a erizafa hugahie.

6

Famo'ene tramemofo naneke

¹ Hagi mofavremotma, tamarera tamafa kea antahizmita amage anteho, tamagra Rantimofa suza mani'naze. E'inahu'ma hanageno'a knare hugahie.

² Pusa kasegefina, huvempa ke'ne agu'afina me'negu, neramrerane neramafa ke antahita amage anteho.

³ E'inama hanutma knare hugahaze, ana nehutma za'za kna'a ama mopafina manigahaze. (Eks-Ati 20:12)

⁴ Zamafaheta mofavre nagatmia zamarimpa eri haviza osiho, hanki zamazeri fatgo nehutma zamavumro nezmantetma, Ramo'ma hu'neankante antetma huzmasmiho.

Kazokzo eri'za vahe'ene kva vahe'zmimofo naneke

⁵ Hagi kazokzo eri'za vahe'motma, tamagra kva tamima mani'nesimofonku kore hunentetma tamahirahi neresigeta kezmia amage anteta, tamagu'areti kazigazi huta, Kraisi eri'za enerizankna huta eriho.

⁶ Mopafi kva vahe'tmimo'za neramagesageta eri'zana erisunke'za muse hanaze osiho. Hianagi Kraisi kazokzo eri'za vahe nesampreta, tamagu'areti Anumzamofa avemanesia zanke hugahaze.

⁷ Mopafi vahe'mokizmi eri'zana e'norizanki, so'e tamarimpareti Ramofo eri'zana eriho.

⁸ Antahi ankeri, mago'mo'ma knare eri'zama enerisuno'a, e'i ana knare eri'zamofa nona'a Ramofonteti mizana erigahie. Kazokzo eri'za ne'mopi amne ne'mopi mago'zahu zanke huke mizana erigaha'e.

⁹ Hanki kva vahe'motama, eri'za vahetmia magozahu tamavutma hunezmantetma, zamazeri korera osiho, monafi nemaniam kva ne'mo tarega'motma kva mani'ne, hankino Agra

mago'mofona azeri knare nehuno, mago'mofona azeri havizana osugahie.

Sondia vahe kna huta Avamupi manisuna naneke

¹⁰ Hanki vagare nanekema tamasmisuana, Ramofonte hanavetitma Agri hihamu'mofo hanavefi manigahaze.

¹¹ Maka Anumzamofa ha' kukena eri hankreho, ana nehutma Sata'ma reramategama hania zampina oti hanavetitma manigahaze.

¹² Na'ankure tagra mopafi vahe'enena hara nosune, hagi mopafi kva hu'naza vahe'ene, hihamune havi avamutamine, mopafi hanizamofa kva hu'naza ha' vahe'ene, mona kankamumpima kefozamofa ha' avamu'ene hara nehune.

¹³ E'i zanku maka Anumzamofa ha' kukena hiho, ana hu'netma havi knafine ana maka'zama hanafina oti hanave tighaze.

¹⁴ E'i zanku oti hanavenetita, tamage kereti tamu nofira nehutma, fatgo avu'ava'zana tamahihi'zarera hanko antea kna hiho.

¹⁵ Knare Musenkefinti e'nea rimpa fru kea, tamagia ano anteakna nehuta, hanavetita otigahaze.

¹⁶ Maka zampina, tamentintimo'a hanko tamigna hu'nena, Sata'ma teve taginteno'ma tamagritega ahethresigeno esnia kevea resu hugahie.

¹⁷ Anumzamo'ma tamagu'vazino tamazahu'nea antahintahia, fetori kna hutma tamasenirera antegahaze. Avamu'mofo kazinknona Anumzamofa naneke eneritma,

¹⁸ maka zupa nunamu huvava nehutma, avamupi nunamuna hutma antahigehe. Ana

nehanutma tamagra kva hu'netma kazigazi hutma maka Anumzamofa vahekura (kristen) nunamu hutma Anumzamofona antahigeho.

¹⁹ Ana nehutma nagriku nunamu hutma antahigenkeno, nagira erioza hanige'na korera osu'na hanavetina oku'a me'nea naneke huama hu'na Knare Musenkea zamasm'i'nenno.

²⁰ Na'ankure nagri'ma nazeri oti'nege'na, Agri agi eri'na seni nofite kina hu'na mani'nenno, ana nanekema hanufina nagra hanaveti'na mani'nenno huama ha'nenno.

Huvagare naneke

²¹ Hu'neanagi, nagrama mani'noa zamofona, Tikikusima tavesinentona nerafu'ma, Rantimofa eri'za ne'mo maka nanekea tamasmisigeta tamagra antahigahaze.

²² Nagra anazanku hu'na huntogeno tamagritega neviangkitma tagenke'a nentahisageno tamagu'a tamazeri hanavetigahie.

²³ Hagi tafuhetane, tasareheta tamamentinti nehutma ovesinte avesintema nehaza naga'motma, Anumza Nerafanteti'ene, Ranti Jisas Kraisine rimpa fruzamo'a tamagrane mesie.

²⁴ Asunku zamo'a Ranti Jisas Kraisinku avesinte vava nehaza vahepi me'nenkeno, avesi'ma nentaza zamo'a vaga oregahie. Tamage.

Anumzamofu Ruotage Avontafere
The Holy Bible in the Kamano-Kafe language of Papua
New Guinea
Buk Baibel long tokples Kamano-Kafe long Niugini

copyright © 2022 Tyndale Bible Translators

© Tyndale Bible Translators

Language: Kamano-Kafe (Kamano)

Translation by: Tyndale Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-03-12

PDF generated using Haiola and XeLaTeX on 18 Apr 2025 from source files dated 12 Mar 2025

f1057ba4-e8d1-53e3-baf9-315ebf4a8836